

四庫全書

子部

欽定四庫全書

冊府元龜卷九百七十二 宋王欽若等撰

外臣部

朝貢第五

唐肅宗寶應元年五月戊申迴紇吐蕃黑衣大食等國
六月寧遠吐蕃獅子波斯等國八月奚契丹寧遠國九
月波斯新羅十二月黑衣大食火尋寧遠石國並遣使
朝貢

永泰元年冬回紇首領胡祿都督弟二百餘人自涇陽
來朝

二年三月新羅王金憲英遣使朝貢

四月回紇遣首領密悉吉等及牙帳一百人來朝

大歷二年七月吐蕃及渤海並遣使來朝

八月契丹渤海九月靺鞨渤海室韋十月回紇十一月
渤海回紇吐蕃十二月回紇渤海契丹室韋等國各遣
使朝貢

是年新羅王金乾運遣其臣金隱居奉表入朝貢方物
三年七月回紇九月新羅十一月訶陵國遣使朝貢

四年正月牂牁訶陵黑衣大食二月牂牁三月渤海靺
鞨十二月回紇吐蕃契丹奚室韋渤海訶陵並遣使朝
貢

六年九月波斯國遣使獻真珠琥珀等

十月回紇遣使來朝

十一月奚契丹並遣使來朝

七年五月新羅十二月回紇吐蕃大食渤海靺鞨室韋契丹奚牂牁康國米國九姓等各遣使朝貢

八年四月渤海遣使來朝并獻方物回紇遣使阿德俱裴羅來朝引見于右銀臺門新羅遣使賀正見于延英殿并獻金銀牛黃魚牙紬朝霞紬等方物

六月回紇遣使羅仙闕等來朝引見於右銀臺門渤海遣使賀正新羅遣使謝恩並引見於延英殿

十一月渤海遣使朝貢

閏十一月渤海室韋並遣使來朝回紇使散支赤心裴羅達干等還蕃引辭于銀臺門

十二月渤海室韋牂牁並遣使來朝奚契丹渤海靺鞨並遣使朝貢

九年正月室韋渤海並來朝

三月回紇遣使裴羅達干來朝

四月回紇使裴羅達干還蕃引辭於延英殿新羅遣使朝貢

六月吐蕃遣使來朝

七月回紇遣使骨吐祿梅還達干等來朝並進馬四十匹
黑衣大食吐蕃並遣使來朝

十月回紇遣使來朝見於銀臺門新羅遣使賀正見於延英殿

十二月奚契丹渤海室韋靺鞨遣使來朝

十年正月渤海契丹奚室韋靺鞨新羅五月渤海六月新羅渤海十二月渤海奚契丹室韋靺鞨各遣使朝貢

十一年七月新羅遣使來朝且獻方物

十月新羅遣使朝貢

十二年正月牂牁遣使來賀正渤海遣使來朝并獻日本國舞女一十一人及方物

二月渤海遣使獻鷹

四月牂牁渤海奚契丹室韋靺鞨六月契丹八月契丹十二月新羅渤海靺鞨室韋奚契丹並遣使來朝各獻方物

十三年正月日本國遣使朝貢

德宗建中元年二月日本國七月東蠻烏蠻守愈等十月渤海並遣使朝貢

三年閏正月新羅牂牁陁國五月渤海國並遣使朝貢
貞元四年四月東蠻鬼主驟笏等來朝先是東蠻自陷
嵩州後臣於吐蕃絕朝貢者二十餘年至是劍南節度
韋臯招誘之始棄吐蕃內附

五月壬申回紇遣使來朝

六年二月回鶻三月牂牁並遣使朝貢

七年正月回鶻大首領史勃羨渤海黑衣大食五月回鶻九月契丹並遣使來朝

八年四月回鶻五月迴鶻閏十二月牂牁靺鞨皆遣使朝貢是月室韋都督和解熱素等來朝

九年九月回鶻遣使朝貢

十月環王國獻犀牛帝令見於太廟

十二月室韋大都督阿朱等三十人來朝貢是年契丹

遣使來朝

十年契丹遣使來朝是年南詔王遣使蒙湊羅棟等來獻鐸槊浪人劍及吐蕃印八紐

十一年二月回鶻遣使來朝

九月南詔異牟尋遣使獻馬六十疋

是年契丹大首領熱蘇二十五人來朝

十二年十二月東女國王湯立悉哥隣國王董卧庭弱水國王董辟和逋租國王弟鄧吉知并大首領等並赴

元正朝會回紇并南詔蠻遣使朝貢

十四年十二月南詔異牟尋遣酋望大將軍王丘各等朝賀元正各獻方物

十七年奚梅落索低契丹烏鬼牂牁謝懷珠皆見

十八年正月驃國王始遣其弟悉利移來朝獻其國樂凡十曲與樂工三十五人來朝樂曲皆演釋氏經論之詞意是月南詔使來朝虞婁越喜等首領見

二十年十一月渤海新羅遣使來朝

十二月南詔蠻彌臣國日本吐蕃並遣使來朝貢

又云吐蕃

遣臧河南觀察使論乞丹及僧南撥特計波等五十四人來朝

順宗即位初吐蕃使論悉諾等來朝獻方物

憲宗以永貞元年即位十一月南蠻及昆明牂牁並遣使來朝

元和元年閏六月吐蕃八月新羅南詔蠻十月迴鶻十二月迴鶻契丹渤海牂牁南詔驃國各遣使朝貢

二年十二月吐蕃迴鶻奚契丹渤海牂牁南詔並遣使

朝貢

三年新羅王金重興遣使金力奇來朝

四年十二月南詔牂牁昆明皆遣使朝貢

五年正月渤海遣使高才南等來朝

十月新羅王遣其子來獻金銀佛像及佛經幡等上言
爲順宗祚福並貢方物

十一月奚契丹並遣使朝貢渤海王遣子大延真等來
獻方物

十二月牂牁南詔並遣使朝貢

七年二月吐蕃遣使朝貢

四月新羅賀正兼告哀使金昌男等五十四人朝見是年渤海亦遣使來南詔遣使朝貢

八年十一月契丹達干可葛等二十九人朝貢

十二月牂牁刺史謝稱渤海王子辛文德等九十七人來朝是年真臘國遣使李摩那等來朝

九年正月渤海使高禮進等三十七人朝貢獻金銀佛

像各一

九月真臘國遣使朝貢

十一月渤海遣使獻鷹鷂迴鷂使醫德密施等三十七人來朝契丹大首領梅落鷂劣來朝

十二月渤海遣使大孝真等五十九人來朝

十年七月渤海王子大庭俊等一百一人二月黑水酋長等十一人並來朝貢

八月訶陵國遣使獻僧祇僮及五色鸚鵡頻伽鳥并異

香名寶

十一月契丹南詔蠻並遣使朝貢

十一年正月奚首領來朝獻名馬

爾後每歲朝貢不絕或二三至其每歲朝

貢常數百人至幽州則選其酋渠三五十人赴闕引見于麟德殿錫以金帛遣還餘皆駐而館之率為常

是月回鶻遣使朝貢

二月回鶻使獻橐駝及馬三月渤海靺鞨十一月契丹

渤海十二月南詔牂牁昆明國並遣使朝貢

十二年二月渤海三月新羅遣使朝貢

四月吐蕃使論乞髯獻馬十匹玉腰帶二條金器十事
犛牛一十二月南詔契丹首領介落等朝貢

十三年四月高麗國進樂器及樂工兩部是年訶陵國
遣使進僧祇女二人鸚鵡玳瑁及生犀等

十五年閏正月渤海十月闍婆十一月新羅並遣使朝
貢十二月渤海復遣使朝貢是年南詔遣使來朝詔自
十二年至是比歲遣使來朝或年內二三至者

穆宗長慶二年正月渤海三月回鶻六月吐蕃並遣使

朝貢

十月回紇使者僕固昌獻其國信四床女口六人葛祿口四人

十二月回鶻吐蕃新羅契丹奚牂牁並遣使朝貢

三年九月南詔王丘佺進其國信金碧文絲十有六品
四年二月吐蕃渤海遣使朝貢

十月吐蕃貢犛牛等又獻鑄成銀犀牛羊鹿各一

十二月回鶻吐蕃奚契丹並遣使朝貢

敬宗寶歷元年三月吐蕃渤海七月回鶻十月回鶻十
二月回鶻奚契丹並遣使朝貢

二年正月南詔室韋渤海牂牁三月昆明並遣使朝貢
文宗太和元年四月渤海遣使來朝

八月吐蕃使論壯大熱進國信金銀器玉腰帶及馬等
三年十二月渤海新羅室韋契丹南詔皆遣使朝貢

四年十二月吐蕃回鶻新羅渤海南詔蠻牂牁昆明奚
契丹並遣使朝貢

五年二月新羅王子金能儒並僧九人闍婆國朝貢使
李南呼祿等十七人並入朝

十一月吐蕃回鶻奚契丹新羅渤海南詔牂牁並遣使
朝貢

六年三月渤海王子大明俊來朝

七年正月渤海王遣同中書右平章事高寶英來謝策
命

八年南詔遣使來朝

九年十二月契丹大首領介落等一十九人室韋大勝
督阿成等三十人奚大首領匿舍朗等並三十人來朝
開成元年二月黔南觀察使奏先是義州昆明部落鬼
主阿珮繼襲義州刺史朝貢不絕為明州牂牁所阻逮
今百餘年願歸王化詔曰且許今年內一度來朝
十一月契丹大首領列環等三十一人來朝

十二月吐蕃回鶻新羅渤海奚契丹牂牁南詔蠻昆明
各遣使朝貢室韋大都督阿朱等來朝

二年二月牂牁來朝

十月回鶻遣使朝貢

十一月契丹遣使朝貢

十二月南詔及室韋朝貢

三年七月昆明差使朝貢

十二月日本國遣使朝貢進真珠絹

四年正月闍婆國遣使李南呼祿來朝貢

閏正月南詔回鶻日本牂牁各遣使朝貢

十二月戊辰渤海王子大延廣契丹首領薩葛奚大首領溫訥骨室韋大都督秩虫等朝貢

五年南詔遣使朝貢

武宗會昌二年二月牂牁南平蠻結骨國遣使朝貢室韋大首領熱論等來朝

三年八月黠戛斯遣使諦德伊斯難珠來朝

六年正月南詔契丹室韋渤海牂牁昆明等使並朝于

宣政殿

宣宗大中七年四月日本國遣王子來朝獻寶器音樂
帝謂宰執曰近者黃河清今又日本國來朝朕媿德薄
何以堪之因賜百僚宴陳百戲以禮之

懿宗咸通末契丹王曰習爾之累來朝貢方物

梁太祖開平元年四月契丹首領袍笏梅老來朝貢方
物

五月渤海王子大昭順貢海東物產契丹首領袍笏課
哥梅老等來朝契丹久不通中華聞帝威聲乃率所部

來貢三數年間頻獻名馬方物

二年正月吐蕃遣使唱來朝貢

二月契丹王阿保機遣使貢良馬方物

五月契丹國王阿保機遣使進良馬十匹金花鞍轡貂

鼠皮頭冠并裘男口一名蘇年十歲女口一名譬年十

二契丹王妻亦附進良馬一匹朝霞錦金花頭冠麝香

前國王欽德亦進馬其國中節級各羌使進獻共三十

一人表六封

三年三月渤海王大諲譔差其相大誠諤朝貢進兒女口及物貂鼠皮熊皮等

五月賜回紇朝貢使阿福引分物

閏八月鴻臚寺引進契丹阿保機差首領葛鹿等進金鍍鐵甲金鍍銀甲及水精玉裝鞍轡等物馬一百匹其阿保機母妻各進雲霞錦一疋

四年正月邕州節度使葉廣略進如洪洞生獠蠻蜜一十人赴闕朝見前朝末道路梗塞遠夷進貢罕有至者

帝即位威畧柔遠東南蠻貊相繼來庭

五年四月契丹王阿保機遣使實柳梅老朝貢

乾化元年八月渤海國遣使朝賀且獻方物

十二月帝御朝元殿以回鶻吐蕃二大國首領入覲故也扇開所司道二首領與僬從等一百二十二人伏拜庭下即各以其君長所上表及方物等陳而獻焉

二年五月渤海王大諲譔差王子大光贊景帝表并進方物

十月契丹蜀括梅老等朝貢

十一月回鶻遣都督周易言等入朝進貢

後唐莊宗同光元年十一月新羅國王金朴英遣倉部侍郎金樂錄事參軍金幼卿朝貢賜物有差

十二月奚首領李紹威遣使朝貢

二年正月新羅王金朴英並本國泉州節度使王逢規遣使朝貢渤海王子大禹謨來朝貢

二月党項遣使朝貢

四月回鶻都督李引釋迦副使田鐵林都監楊福安等
六十六人陳方物稱本國權知可汗仁美在甘州差貢
善馬九匹白玉一團是月沙州曹義進玉三團礪砂羚羊
角波斯錦茸褐白氎生黃金星簪等

五月渤海國王大諲譔遣使姪元讓貢方物

六月新羅遣使朝散大夫倉部侍郎賜紫金岳來朝貢
九月黑水國遣使朝貢

十一月党項進白驢奚王李紹威進馳馬回鶻都督安

子想進玉圍馳馬等

十二月党項薄備香來貢良馬其妻韓氏進馳馬

三年正月河西部落折驕兒貢馳馬

二月河西郡族折文逋貢馳馬熟吐渾李紹魯貢馳馬
党項折願慶貢方物又突厥渾解樓貢方物渤海國王
大諲譔遣使裴璆貢人參松子昆布黃明細布貂鼠皮
被一褥六髮靴革奴子二熟吐渾都督赫連海龍貢羊馬
五月黑水胡獨鹿女真等使朝貢契丹阿保機遣使搜

鹿孟貢方物

十月奚吐渾突厥首領使人貢方物為萬壽節高麗國遣使韋仲貢方物

四年正月達怛都督折文通貢馳馬回鶻可汗阿咄欲遣都督程郡明貢馬

明宗天成元年四月渤海國王大諲譔遣使大陳林等一百一十六人朝貢進兒口女口各三人人參昆布白附子及虎皮等

七月契丹國王遣梅老里述骨之進內官一人馬二匹地衣真珠裝金釧金釵等渤海使人大昭佐等六人朝貢

十月雲南雋州山後兩林百蠻都鬼主右武衛大將軍李卑晚遣大鬼主傅能何花等來朝貢帝御文明殿對之百僚稱賀

二年正月突厥首領張慕晉來朝貢

二月新羅國使兵部侍郎張芬等來朝貢

四月新羅國康州遣使林彥來朝貢

八月昆明大鬼主羅殿王普露靜王九部落各差使若
土等隨牂牁清州八郡刺史宋朝化等一百五十三人
來朝共進草豆蔻二萬顆朱砂五百兩黃蠟三百斤

九月河西党項如連山等來朝共進馬四十疋契丹差
梅老沒骨已下進奉

十二月回鶻西界吐蕃發使野利延孫等入貢蕃僧四
人持蕃書兩封文字未詳

三年正月契丹使禿納梅老已下五十人進奉

二月吐渾都督李紹魯等進馬一百二十匹迴鶻權知
可汗仁裕遣都督李阿山等十八人入貢

四月達怛使人朝貢

閏八月契丹使梅老季吐蕃迴紇等使各貢奉

九月吐蕃遣使朝貢

十一月吐渾念九等共進馬五十三疋党項吐蕃相次

朝貢

十二月迴鶻差使朝貢

四年四月契丹差使撩括梅里等朝貢

五月渤海遣使高正詞入朝貢方物

六月故奚王男素姑進其父鞍馬衣甲器械

八月黑水遣使骨至來朝兼貢方物吐渾首領念公山

念坦相次來朝貢党項折遇明等來貢方物高麗國王

王建遣使廣平侍郎張芬等五十三人來朝貢銀香獅

子香爐金裝釵鏤雲星刀劍馬突金銀鷹韜韜鞞鈴錦

鬪腰白紵白氍頭髮人參香油銀鏤剪刀鉗鈇松子等
九月党項折文通進馬西涼府蕃官撥心吐蕃首領撥
里忙布蘭羣等並來朝生吐渾北海兒進駝馬

十月達怛首領張十三朝党項首領來有行進馬四十
疋

長興元年二月黑水兀兒遣使貢方物

四月吐蕃首領干撥葛進犛牛二頭

五月回鶻孽乘祖等來朝貢回鶻國使安黑連來朝貢

又回鶻可汗仁裕遣使來貢方物

六月契苾指揮使李骨西等來朝

八月吐渾康合畢來貢駝馬

九月河西蕃官姚東山吐蕃首領王滿儒等三十人進馬八十疋玉一團沙州曹義金進馬四百疋玉一團

二年正月河西党項折七移等進駝馬東丹王突欲進馬十疋氊帳及諸方物又進本國印三面宣示宰臣達怛列六薛娘居等進馬

二月突厥首領杜阿熟吐渾康萬琳各進馬

八月契丹遣使邪姑兒朝貢

十月西涼府蕃官撥心等朝貢

十一月党項達怛阿屬朱並來朝貢

十二月西涼府及回鶻使安永思渤海使文成角並來朝貢党項首領來進所奪得契丹旗并馬

三年正月契丹遣使拽骨等來朝渤海回鶻順化可汗等吐蕃各遣使朝貢涼州奏將吏有狀請朝廷命師兼

進方物沙州進馬七十五疋玉三十六團

二月吐蕃遣首領野利閻心等朝貢是月契丹穆順義
先是遣還本國迴進馬三疋及方物藥

三月契丹遣使都督起阿鉢等一百一十人進馬一百
疋及方物達怛嘗葛蘇進馬十疋及方物又契丹遣使
鐵葛羅卿獻馬三十疋高麗國遣使大相王儒朝貢

四月新羅國權知本國王金溥遣使執事侍郎金肱貢
方物

八月吐蕃遣使朝貢見於端明殿帝問本蕃牙帳去京師遠近對曰涇州西二千里比年阻大水朝貢後時

九月契丹國遣使都督述祿卿進馬四十疋

四年五月契丹遣使朝貢

七月回鶻都督李末等三十一人進白鶻一聯勅禮賓使解縹放之

十一月吐蕃遣使來貢奚首領李素姑來朝貢

閏帝應順元年正月契丹遣都督沒辣來朝獻馬四百

馳十羊二千先是遣供奉官四方環入契丹復命故有是獻

是月沙州瓜州遣牙將各以方物朝貢回鶻可汗仁美遣使獻故可汗仁裕遺留貢物鞍馬器械仁美獻馬二團玉鞞轡硯砂羚羊角波斯寶縹玉帶

廢帝清泰元年八月青州言高麗入貢使金吉船至岸北京言契丹遣使達怛朝貢部送京師是月達怛首領没干越等入朝貢羊馬

二年正月生吐渾首領姚胡入朝獻馬

四月新州言党項拓跋黑連欲入朝貢奉從之

六月詔邠涇鄜耀四州兵應接回鶻出州入貢

七月回鶻可汗仁美遣都督陳福海而下七十八人獻馬三百六十疋玉二十團白氍毹斜褐犛牛尾綠野馬皮野駝峰沙州刺史曹義金涼州留後李文謙各獻馬三疋瓜州刺史慕容歸盈獻馬五十疋

十月高麗國王王建遣使入朝貢方物

十一月渤海遣使列周義入朝貢方物

十二月高麗遣使禮賓卿邢順等來朝貢

三年正月百濟國遣使入朝貢方物高麗遣使王子大相王規等來貢方物

晉高祖天福二年六月契丹使夷離畢進馬二百疋人參貂鼠皮走馬木椀等物

三年三月可汗回鶻王仁美進野馬獨峯駝玉轡頭大鵬砂碯砂脛胛臍金剛鑽羚羊角白貂鼠皮安西絲白

九月契丹使粘木孤來獻牛馬犬腊顛騾十驄高麗王
王建使廣評侍郎邢順等九十二人以方物來朝

十月罷延族吐蕃大首領聶褒郎彝磨標昌訶兀羅只
褒等率屬朝貢

五年正月回鶻可汗仁美遣都督石海金來朝貢良馬
百驄白玉百圍謝冊命也

十月契丹使舍利來聘致馬百匹及玉轡鏤鞍氈裘狐
矢組繡橐鞬等

六年五月吐渾大首領白承福及麾下念厖里赫連功德來朝七月突厥遣使薛同海已下一十七人來朝貢
九月吐渾遣首領白可久等一百一十八人朝貢

七年二月契丹遣使大卿已下三十一人來聘獻馬及
方物

三月吐渾使慕容金進已下十四人見進馬十四匹

六月吐渾都督白承福遣指揮使念醜漢朝貢

少帝天福七年回鶻都督來朝獻馬三百疋玉百圍玉

帶一

八年七月壬午契丹回圖使喬榮通郝在殷到闕各進馬一疋

九月吐渾遣都督赫連功德副使白可久節度使白承福男鐵櫃高麗遣使王子太相王中一等來朝貢

開運二年二月回鶻可汗進玉團獅子玉鞍硎砂紅鹽野駝峰安西白氍毹胸臍大鵬砂羚羊角犛牛尾貂鼠等物

十月高麗遣使廣評侍郎韓元圭等來朝貢

漢隱帝乾祐元年五月回鶻可汗遣使入貢獻馬一百
二十疋玉鞍轡玉圍七十三白氍百二十七貂鼠皮二
百二十六犛牛尾一百四十八玉鞞鞣三百三十四又
羚羊角硃砂諸藥于闐國遣使朝貢

周太祖廣順元年二月西州回鶻遣都督來朝貢玉大
小六團一團碧琥珀九斤白氍布一千三百二十九段
白褐二百八十段珊瑚六樹白貂鼠皮二千六百三十

二黑貂鼠皮二百五十青貂鼠皮五百三舊貂鼠襖子
四白玉環子碧玉環子各一鐵鏡二玉帶鉸具六十九
玉帶一諸香藥稱是回鶻遣使摩尼貢玉團七十七白
氍毹三百五十青及黑貂鼠皮共二十八玉帶玉鞍轡
鉸具各一副犛牛尾四百二十四大琥珀二十顆紅鹽
三百斤胡桐淚三百九十斤餘藥物在數外

四月西域僧嚩囉朝貢

二年正月高麗權知國事王詔遣廣評侍郎徐逢等九

十七人來朝貢

三月回鶻遣使每與難支使副骨迪歷等十二人來朝
貢玉團三珊瑚樹二十琥珀五十斤貂鼠皮毛褐白氍
毹皮靴等

七月高麗僧思泰獻方物

三年正月回鶻入朝使獨呈相溫貢白氍毹段七百七十
玉團一珊瑚片七十

十一月西天僧薩滿多等十六族貢馬

世宗顯德元年二月回鶻朝貢使以寶玉進上

五月回鶻朝貢使因難狄略進方物

十月高麗國遣王子大相王融來貢方物

二年十一月高麗復遣本國廣評侍郎荀質來貢方物
稱賀登極

三年二月回鶻遣使貢方物

五年九月占城國王釋利因德漫遣其臣莆訶散等來
貢方物中有灑衣薔薇水一十五琉璃瓶言出自西域

凡鮮華之衣以此水灑之則不黧而復郁烈之香連歲不歇又進猛火油八十四琉璃瓶是油得水而愈熾彼國凡水戰則用之

六年正月高麗國王王昭遣使臣王子佐蒸王兢佐尹皇甫魏光等來進名馬及織成衣襖弓劍器甲等女真國遣使阿辨等來貢方物


二月回鶻使貢方物

六月占城國進奉使蒲訶散以雲龍形通犀帶一條菩

薩石一片上進

恭帝顯德六年八月高麗國遣使朝貢兼進別序孝經一卷越王孝經新義八卷皇靈孝經一卷孝經雌圖二卷

十一月高麗復遣使貢銅五萬斤白水精各二千顆



冊府元龜卷九百七十二

欽定四庫全書

子部

冊府元龜卷九百七十六
三至

詳校官中書臣賈鉞

侍讀臣孫球覆勘

總校官庶吉士臣何思鈞

校對官中書臣葉蘭

謄錄監生臣任銜葵

欽定四庫全書

冊府元龜卷九百七十三 宋 王欽若等 撰

外臣部

助國討伐

忿鷙嗜貪以攻戰爲業者夷狄之謂也故古先哲王懷之以恩信驚之以威武長轡遠馭羈縻不絕而已至乃皇靈所及惠澤遐暢革心面內嚮風慕義或出師於經綸之始或致騎於討伐之際或隣壤之亂資之驅除狂

寇之法亟往戡定或奏牘以明誠款或應募而效忠順
或饋餽之師旅或鄉道乎國邑至有席和親之勢赴中
原之難奮發義勇廊廟氛祲者焉詩曰食我桑椹懷我
好音苟非慎德之至敷教之廣亦疇能感動殊類致其
死力哉鼂錯有言曰以蠻夷攻蠻夷中國之形也斯王
者撫御之畧可不務乎

周武王伐商羗髻率師會于牧野

書所謂微盧
彭濮是也

漢高祖初為漢王元年五月發夷還伐三秦秦地既定

乃遣還巴中復其渠帥羅朴督鄂度夕龔七姓不輸租賦餘戶乃歲入寶錢口四十世號為版楯蠻夷遂世世服至于中興郡守常率以征伐

四年八月漢王擊楚軍廣武北貉

莫客切

燕人來致梟騎

助漢

貉在東北方三韓之屬皆貉類也

武帝元鼎五年四月南越王相呂嘉反使馳義侯遺

遺越

人降為馳義侯

別將巴蜀罪人發夜郎兵下牂牁江咸會番禺

遺兵未及下南越已下帝便令征西南夷平之

天漢二年以匈奴降者界和王為開陵侯將樓蘭國兵
始擊車師

征和四年遣重合侯馬通將四萬騎擊匈奴道過車師
北復遣開陵侯將樓蘭尉犁危須凡六國兵別擊車師
勿令得遮重合侯諸國兵共圍車師王降服臣屬

昭帝始元五年秋大鴻臚田廣明擊平益州夷帝曰鈞
叮侯亡波率其邑君長人民擊反者

鈞音鉅于切
叮音大鼎切斬首

捕虜有功其立亡波為鈞叮王

宣帝本始二年六月大發擊匈奴初昭帝末匈奴連發

大兵侵擊烏孫取車延惡師帝使使謂烏孫趣持公主

來

武帝以宗室女妻烏孫也

烏孫公主上書下公卿議救未決會帝

即位烏孫昆彌復上書言連為匈奴所侵削昆彌願發

國半精兵人馬五萬匹盡力擊匈奴唯天子出兵哀救

公主於是大發關東輕銳士選郡國吏三百名抗健習

騎射者皆從軍遣御史大夫田廣明五將軍出塞及校

尉常惠使護發兵烏孫西域昆彌自將翕侯以下五萬

餘騎從西方入與五將軍兵凡二十餘萬衆匈奴聞漢

兵大出老弱奔走毆畜產遠遁逃

奔古奔字
毆與驅同

是以五將

軍少所得常惠與烏孫兵至右谷蠡庭獲單于父行

音行

胡浪切

及嫂居次名王犁汗都尉千長將以下三萬九千

餘級虜馬牛羊驢羸橐駝七十餘萬漢封惠為長羅侯

然匈奴民衆死傷而去者及畜產遠移死亡不可勝數

於是匈奴遂哀耗

耗減也音
呼到切

地節二年漢遣侍郎鄭吉校尉司馬熹將免刑罪人田

渠犁積穀欲以攻車師至秋收穀吉憲發城郭諸國兵
萬餘人自與所將屯田士千五百人共擊車師交河城

破之

謂西域諸國為城郭者言不
隨畜牧遷徙以別於匈奴

元康元年衛侯馮奉世使送大宛客即以節諭告諸國
王因發其兵南北合萬五千人擊殺莎車王

元帝建昭二年西域副校尉陳湯矯制發城郭諸國兵
車師戊己校尉屯田吏士漢兵胡兵合四萬餘人擊郅
支單于斬之生虜百四十人降虜千餘人賦子城郭諸

國所發十五王

賦子謂班予之也所發十五王謂所發諸王之兵共圖邗支王也

後漢建武初氏人悉附後隗囂族人隗茂反殺武都太守氏人大豪齊鍾留為種類所敬信威服諸豪與郡丞孔奮擊茂破斬之

十八年夷渠帥棟蠡與諸種反十九年武威將軍劉尚發廣漢犍為蜀郡人及朱提夷合萬三千擊平之

二十五年南匈奴單于遣弟左賢王莫將兵萬餘人擊北單于弟真鞬左賢王生獲之又破北單于帳下並得

其衆合萬餘人馬七千疋牛羊萬頭北單于震怖却地
千里初帝造戰車可駕數牛上作樓櫓置于塞上以拒
匈奴時人見者或相謂曰讖言漢九世當却北狄地千
里豈謂此耶及是果拓地焉北部真鞬骨都侯與右骨
都侯率衆三萬餘人來歸南單于

二十五年鮮卑都護偏何等詣遼東太守祭彤求自効
功因令擊北匈奴左伊育訾部斬首二千餘級

明帝永平元年鮮卑都護偏何擊破赤山斬其魁帥持

首級詣遼東受賞賜

五年北匈奴六七千騎入于五原塞遂寇雲中至原陽南單于擊却之西河長史馬襄赴救虜乃引去

十六年大發緣邊兵遣諸將四道出塞征北匈奴南單于遣左賢王信隨大僕祭彤及吳棠出朔方高闕攻臯林溫禺犢王於涿邪山虜聞漢兵來悉渡漠去彤棠坐不至涿邪山免

章帝建初元年臯林溫禺犢王復將衆還居涿邪山南

單于聞知遣輕騎與緣邊郡及烏桓兵出塞擊之斬首數百級降者三四千人是年哀牢王類牢反叛帝募發越雋益州永昌夷漢九千人討之明年春邪龍縣昆明夷鹵承等應募率種人與諸郡兵擊類牢於博南大破斬之傳首雒陽賜鹵承帛萬匹封為破虜傍邑侯

和帝永元元年以征西將軍耿秉與車騎將軍竇憲率騎八千與度遼兵及南單于衆三萬騎出朔方擊北虜大破之北單于奔走首虜二十餘萬人

二年南單于復上求滅北庭遣行中郎將班固報命南單于於是遣左谷蠡王獅子等將左右部八千騎出雞鹿塞中郎將耿譚遣從事將護之至涿邪山乃留輜重分為二部各引輕兵兩道襲之左部北過西海至河雲北右部從匈奴河水西繞天山南度甘微河二軍俱會夜圍北單于大驚率精兵千餘人合戰單于被創墜馬復上將輕騎數十遁走僅而免脫得其玉璽獲閼氏及男女五人斬首八千級生虜數千口而還

鮮卑大都護校尉鹿帥部衆從烏丸校尉任嘗擊叛者
封校尉為率衆王

安帝元初元年秋西羗號多與諸種鈔掠武都漢中巴
郡板楯蠻將兵救之漢中五官掾程信率壯士與蠻共
擊破之號多退走還斷隴道與零昌通謀護羗校尉侯
霸騎都尉馬賢將湟中吏人及降羗胡抱罕擊之

三年夏度遼將軍鄧遵率南單于及左鹿蠡王須沈萬
騎擊零昌於靈州斬首八百餘級封須沈為破虜侯

六年秋鮮卑入馬城塞殺長吏度遼將軍法積射士三千人及中郎將馬續率南單于與遼西右北平兵馬會出塞追擊大破之

建元元年十二月高句驪馬韓滅貊圍玄菟城扶餘王遣子與州郡并力討之

是年鮮卑寇遼度遼將軍耿夔與溫禺犢王呼尤徵將新降者出塞討擊

延光元年二月扶餘王遣子將兵救玄菟擊高句驪馬

韓濊貊破之遂遣使貢獻

順帝永建元年西域長史班勇率車師後王農奇子加特奴及八滑等發精兵擊北虜呼衍王破之勇於是上立加特奴為後王八滑為後部親漢侯

是年秋鮮卑其至鞬寇代郡明年春中郎將張國遣從事將南單于兵步騎萬餘人出塞擊破之時遼東鮮卑六千餘騎亦寇遼東玄菟烏桓校尉耿晷發緣邊諸郡兵及烏桓率衆玉出塞擊破之

六年烏桓校尉耿晙遣司馬將胡兵數千人出塞擊鮮卑破之冬漁陽太守又遣烏桓兵擊之烏桓豪人扶漱官勇健每與鮮卑戰輒陷敵詔賜號率衆君

陽嘉元年燉煌太守徐繇遣疏勒王臣槃發三萬人擊于闐破之

是年冬烏桓校尉耿晙遣烏桓親漢都尉戎末鹿率衆王侯咄歸等出塞抄擊鮮卑大斬獲而還賜咄歸等已下爲率衆王侯長賜綵繒各有差鮮卑後寇遼東屬國

於是耿暉乃移屯遼東無慮城拒之

二年春匈奴中郎將趙稠遣從事將南匈奴骨都侯夫
沈等出塞擊鮮卑破之斬獲甚衆詔賜夫沈金印紫綬
及縑綵各有差

三年夏車師後部司馬率加特奴等千五百人掩擊北
匈奴於閭吾陸谷壞其廬落斬數百級獲單于母季母
及婦女數百人牛羊十餘萬頭車千餘兩兵器什物甚
衆

四年春北匈奴呼衍王率兵侵車師後部詔令燉煌太守發諸國兵及玉門關侯伊吾司馬合六千三百騎救之

永和三年冬燒當種那離等叛護羌校尉馬賢將湟中義從兵及羌胡萬餘騎掩擊斬之

五年夏南單于左部句龍王吾斯車紐等背叛度遼將軍馬續與中郎將梁並烏桓校尉王元發緣邊兵及烏桓鮮卑羌胡合二萬餘人掩擊破之

桓帝建和二年白馬羗寇廣漢屬國益州刺史率板楯蠻討破之斬首招降二十萬人

延熹元年鮮卑寇邊冬使匈奴中郎將張奐率南單于出塞擊之

靈帝建寧二年涼州刺史孟佗遣從事任涉將燉煌兵五百人與戊己司馬曹寬西域長史張晏將焉耆龜茲車師前後部合三萬餘人討疏勒攻楨中城四十餘日不能下乃引去

是年高句麗伯固遣大加優居主簿然人等助玄菟太守公孫度擊富山賊討平之

熹平五年諸夷反叛以太尉掾巴郡李顥為益州刺史龐芝發板楯蠻擊破平之

六年南匈奴與中郎將臧旻出雁門擊鮮卑檀石槐大敗而還

獻帝建安十六年七月曹公西征關中田銀反河間鮮卑軻比能將三千餘騎隨烏丸校尉閻柔擊破銀

魏明帝景初三年太尉司馬宣王與高句麗位宮率衆討公孫淵宮遣主簿大加將數千人助軍

齊王正始七年幽州刺史毋丘儉討句麗遣玄菟太守王頌詣扶餘位居遣大加郊迎供軍糧

晉惠帝時鮮卑大人務勿塵遣軍助東海王越征討有功王俊表為親晉王封遼西公嫁女與務勿塵以結隣援

懷帝即位以鮮卑大人務勿塵為大單于率衆助國征

討

宋明帝初即位四方反叛西陽蠻田益之田義之成邪助田光興等起義攻郢州克之以益之為輔國將軍都統四山軍事

後魏大武太平真君九年六月悅般國遣使求與王師俱討蠕蠕帝許之

九月遣成周公萬度歸討馱耆詔伊吾王唐契弟和與伊落率所領起起度歸和奉詔會度歸喻下柳驢以東

六城因共擊破居羅城拔之後同征龜茲度歸令和鎮
鄆耆時柳驢戍主乙真伽率諸胡將據城而叛和領輕
騎一百匹入其城擒乙真伽斬之繇是諸胡款附西域
尅平和有力也

隋煬帝即位初鐵勒犯邊將軍馮孝慈戰不利鐵勒遣
使謝罪請降帝遣黃門侍郎裴矩慰撫之諷令擊吐谷
渾鐵勒許諾即勒兵襲吐谷渾大敗之

大業八年征遼誅靺鞨國渠帥突地稽率其徒以從每

有戰功賞賜厚

唐高祖初舉義兵遣晉陽令劉文靜使於突厥始畢可汗令率兵相應帝至龍門始畢可汗遣特勒康稍利等率兵五百馬二千匹會于麾下又遣二千騎助軍從平涼城

武德三年太宗在藩受詔討劉武周次太原突厥可汗處羅遣其弟步利設率千騎與官軍會

四年巴東蠻帥冉安昌率兵與大軍平蕭銑安昌者盤

瓠之苗裔代為蠻帥

太宗貞觀十三年薛延陀遣使上言高昌雖貌事至尊而翻覆不實擅發兵與欲谷設擊天子所立之國奴受國厚恩嘗思報効乞發所部為官軍前驅以討之帝嘉其誠節遣戶部尚書唐儉右領軍大將軍執失思力齋繒帛以賜之

二十一年遣左驍衛大將軍阿史那社爾為崑山道行軍大總管與安西都護郭孝恪司農卿楊弘禮率五將

又發鐵勒十三部兵十餘萬騎以伐龜茲

二十二年四月西突厥賀魯以王師問罪龜茲固請前
驅願為鄉導仍以數十騎馳來謁帝詔授以崑丘道行
軍總管宴之于嘉壽殿及文武三品畢景甚歡錫賀魯
綾綵仍解所服之衣以賜之

五月右衛率府長史王元策擊帝那伏國大破之初元
策使天竺國會中天竺國王死國大亂那伏帝王阿羅那
順自立發胡兵以拒元策元策宵遁抵于吐蕃之西界

以書徵鄰國之兵吐蕃發精銳一千二百人泥婆羅國

發七千餘騎與元策擊阿羅那順大破之吐蕃尋遣使

來獻捷

又王元策往西域為中天竺所劫章求拔國王發兵赴之破賊有功

六月薛延陀餘衆二萬人侵瀚海金徽幽陵三郡發燕

然副都護元禮臣率九姓鐵勒捕之

薛延陀西遁之衆共推故真珠毗伽

可汗夷男兄子吐摩支為伊特勿失可汗請居鬱督軍山之北鐵勒素服薛延陀之衆及吐摩支之至也九姓渠帥莫不危懼朝議恐為磧北之患令英國公李勣進加討擊率九姓鐵勒二萬騎至天山吐摩支見官軍至

惶駭詣詔使

蕭嗣業請降

七月西突厥國相屈利啜請率所部從討龜茲

是年迴紇菩薩遣使入貢以破薛延陀功賜宴內殿先是擒降突厥頡利等可汗之後北虜唯迴紇薛延陀為盛帝冊西突厥莫賀咄為可汗遣統回紇僕骨同羅思結阿跌等部至是迴紇酋帥吐迷度與諸部大破薛延陀多彌可汗

高宗永徽二年瑤池都督阿史那賀魯叛西據咄陸可汗之地進寇庭州迴紇婆閏等諸部屬請討之帝前後

遣梁建方契苾何力程知節等率兵進討皆不克而還帝乃擢蘇定方為大總管領迴紇等兵與阿史那彌射步真等分出西州金山兩道以經畧之定方至金山之北其俟斤嬾獨祿率萬餘帳來降定方發其千騎進至曳咥河之西賀魯率十姓兵馬且十萬來拒戰定方領迴紇及漢兵萬餘人迎擊賊輕定方兵少四面圍之定方令步卒據其原攢稍外向自領漢騎陳於北原賊先擊步軍三衝不動定方乘勝擊之賊遂大潰追奔三十里

斬獲數萬人明日總兵復追賀魯之衆五弩夫畢部落
相次來降五咄六部落聞賀魯敗各向南道降于步真
所至蕃人皆相率歸降曰我舊主也定方至雙河與彌
射步真相會兩軍合勢去賀魯所居三百里布陣長驅
徑至金牙山賀魯牙所時賀魯集諸衆欲獵定方與彌
射縱兵擊之盡破其牙帳生擒數萬人并獲其鼓纛器
械賀魯遂與唾運及其女夫閭啜等脫走投石國

顯慶元年西突厥賀魯犯邊詔程知節蘇定方等領兵

并迴紇大破賀魯于陰山再破于牙山

則天萬歲通天元年契丹首領李盡忠孫萬榮反叛攻
陷榮府突厥默啜遣使上言請還河西降戶即率部落
兵馬為國家討賊擊契丹制許之默啜遂攻討契丹部
衆大潰盡獲其家口

玄宗開元四年七月突厥可汗默啜背恩為九姓拔曳
固所殺斬其首送至京師

六年契丹婆固為其臣可突于所攻奔營州都督許欽

澹令薛泰帥驍健五百人徵奚王李大酺及婆固合衆以討可突于官軍不利婆固大酺臨陣被殺

八年南天竺國王尸利那羅僧伽請以戰象及兵馬討大食及吐蕃等仍求有以名其軍帝甚嘉之名軍為懷德軍

是年冬朔方大總管王峻奏請西徵拔悉密東發契丹兩蕃期以明年秋初數道俱入掩突厥牙帳於稽落河

上

九年秋拔悉密拔果臨突厥牙帳而王賧及兩蕃不至
悉密懼而引去

二十二年二月新羅王興光從弟左領軍衛員外將軍
忠信上表曰臣所奉進止令臣執節本國發兵馬討除
靺鞨有事續奏者臣自奉聖旨誓將致命當此之時為
替人金孝方身亡便留臣宿衛臣本國王以臣久待天
庭遣從姪至廉代臣今已到訖臣即合還每思前所奉
進旨無忘夙夜陛下先有制加本國王興光寧海軍大

使錫之旌節以討凶殘皇威載臨雖遠猶近君則有命
臣敢不祇蠢爾夷倖計以悔禍然除惡務本布憲維新
故出師義貴乎三申縱敵患貽于數代伏望陛下因臣
還國以副使假臣盡將天旨再宣殊裔豈惟斯怒益振
固亦武夫作氣必傾其巢穴靜此荒隅遂夷臣之小誠
為國家之大利臣等復乘桴滄海獻捷丹墀效毛髮之
功答雨露之施臣所望也伏望陛下圖之帝許焉

天寶三載拔悉密國伐突厥烏蘇米施可汗斬之傳首

闕下

十三載閏十一月東曹國王設阿及安國副王野解及諸胡九國王並遣上表請同心擊黑衣辭甚切至帝方務以懷柔皆勞賜慰喻遣之以安西域

肅宗至德元年八月帝在靈武迴紇首領吐蕃酋長相繼而至並請和親兼之討賊

時安祿山陷西京也

十一月迴紇自北投朔方節度郭子儀與迴紇破同羅賊三千人於河上盡收其器械馳馬輜重旗幡等是年

于闐國王尉遲勝聞祿山反勝乃令弟攝行國事自率兵五千赴難國人遮留勝以少女為質而後行帝待之甚厚授特進兼殿中監

二年二月帝在鳳翔吐蕃遣使來朝請助討賊引見之賜以束帛器物有差

九月回紇葉護太子領兵四千餘衆助討逆賊回紇葉護太子入見帝親宴慰賜以金帛器物恣其所欲待之甚厚元帥廣平王領朔安安西回紇大食之兵十五萬

將收西京王既見回紇王子葉護約為兄弟接之頗有
恩信葉護大喜是月戊子回紇大首領達干等一十三
人從葉護至扶風見郭子儀留之設宴三日葉護太子
曰國家有難遠來相助何暇食為子儀因留之宴畢便
發庚子蕃漢大軍齊進壬寅元帥廣平王分回紇銳卒
剪其埋軍賊知伏師敗氣索回紇又取大營之背與北
庭行營節度李嗣業合勢表裏夾戰自午及酉斬首六
萬級填溝澗而死者十二三賊軍大潰餘軍入城中囂

聲夜不止癸卯元帥廣平王整軍容入長安中軍兵馬使僕固懷恩領回紇及南蠻大食等軍從城南過澧水東下營十月壬戌遂收復東京

十一月回紇葉護自東京至勅百官於長樂驛迎之帝御宣政殿宴設葉護升殿其餘酋長列於階下賜錦綉繒綵金器銀物甚衆葉護辭歸帝謂曰為國家成大事何遽去耶葉護奏曰回紇士卒為陛下更收范陽為馬少不足以討除餘孽請歸取馬帝許之

乾元元年六月回紇遣宰相德領驍將三千人助國討逆賊

七月吐火羅葉護烏那多并九國首領來朝請助國討賊帝令赴朔方行營

二年二月回紇骨啜特勒等率衆從郭子儀與九節度於相州城下戰不利三月壬子回紇王子骨啜特勒及宰相等十五人自相州奔于西京帝宴之于紫宸殿庚寅辭還行營

代宗寶應元年九月回紇可汗舉國兵馬至太原遣使奉表請助王師討平殘寇

十月壬戌詔元帥雍王為諸軍先鋒會諸道節度使于陝州率回紇軍齊進壬申次于雒陽之北郊逢賊史朝義潛使反間回紇左殺執其使以獻甲戌雍王整隊伍為先鋒僕固懷恩等率回紇等繼進大敗賊于橫水朝義東奔汴州東都平時回紇至東京肆行殘忍傷死者萬計代宗以外蕃功高特容之以回紇達啜嬌子骨祿

俟斤襲父特進崇義王留宿衛孫闕達于為員外羽林
將軍放還蕃

永泰元年九月叛臣僕固懷恩誘吐蕃數十萬入寇大
掠京畿而去十月至邠州與回紇相遇復合從入寇河
中節度郭子儀因說回紇曰吐蕃本吾舅甥國無負而
至是無親也若倒戈乘之如拾芥耳且其羊馬蔽地數
百里是謂天賜不可失也今能逐戎以利舉與我繼好
而凱旋不亦善乎會懷恩報死于靈州羣虜無所統遂

許諾吐蕃知之其夕奔退回紇逐之子儀分衆軍以接
其後吐蕃大敗而回紇逐之至靈臺再破之告捷於子
儀使歸諸朝獲牛羊馬數十萬收其所掠士女四千人
大歷二年九月吐蕃寇靈州十月党項首領來朝請助
國供靈州軍糧

十二年吐蕃寇黎雅兩州劍南西川節度使大破之會
南蠻閣羅鳳來援于望漢城生擒吐蕃大寵官論器然
獻于闕下

德宗興元元年二月帝在山南時朱泚盜據宮殿詔以
右散騎常侍兼御史大夫于頔往涇州已來宣慰吐蕃
仍與州府計會頃述時吐蕃款塞請以兵助平國難故
遣使焉

四月渾瑊與吐蕃論莽羅之衆大破朱泚將韓旻張庭
芝宋歸朝等於武功之武亭川斬首萬餘級

貞元五年十月劍南節度使韋臯遣將王有道等與東
蠻兩林苴那時勿鄧夢衝等率兵於故雋州臺登北谷

大破吐蕃青城臘城二節度

八年正月吐蕃與回鶻戰敗徵兵於南詔蠻王異牟尋時牟尋為西川節度使牟臯所招撫已定計歸順欲因徵兵以襲之遣兵五千人往戍又自將數萬踵其後晝夜兼行乘其無備大破吐蕃於神川鐵橋遣使告捷且使臯使閱其所虜獲及城堡以取信焉臯上言牟尋收鐵橋已來城壘一十六擒其王五人降其衆一萬餘

穆宗長慶二年豐州上言前助太原討鎮州回紇李義

節等三千人去三月二十三日歸蕃訖先是裴度招討
幽鎮之亂回鶻請以兵從度討伐朝議大以為不可遂
命中人止回鶻令歸會其已至豐州北界發繒帛七萬
匹賜之方還

懿宗咸通七年十月沙州張義潮奏差迴鶻首領僕固
俊與吐蕃大將尚恐熱交戰大敗蕃寇斬尚恐熱傳首

京師

晉高祖天福二年十一月詔賜北朝曷魯相公聶相公

幽州趙思溫繒帛器皿以前屯瀛州援王師討魏故也

冊府元龜卷九百七十三

欽定四庫全書

冊府元龜卷九百七十四 宋 王欽若等 撰

外臣部

褒異

先王之御夷狄也接之以禮示之以信濡之以惠澤聳之以威德羈縻勿絕而已蓋以其桀驁成性荒簡無常不可以臣畜之也三代而下因其慕嚮厚加恩紀以申撫納或優厥贈賄或被以冠帶賜印綬以異其數班幣

帛以將其意以至殊館穀之待加優戲之娛紆車駕以
臨會命公卿而祖道又復哀其淪喪錄其勲伐恩及母
妻賞逮臣僕用能綏懷遐阻窒其侵叛之原震耀威靈
成乎率服之盛斯亦來遠之奇策也

周成王既伐東夷肅慎來賀

海東諸夷駒麗扶餘濊貊之屬武王克商皆通馬

成王即政而叛成王伐而服之故肅慎氏來賀

王俾榮伯作賄肅慎之命

榮國名同

姓諸侯為卿大夫王使之為命書以幣賄賜肅慎之夷

漢文帝元年以南粵王趙佗親冢在真定置守邑

親謂父母

也歲時奉祀召其從昆弟尊官厚賜寵之

武帝元鼎四年南粵王興上書請比內諸侯三歲一朝
帝許之賜其丞相呂嘉銀印及內史中尉太傅印餘得
自置

元封二年既平西南夷其君長以百數獨夜郎滇受王
印滇小邑也最寵焉

天漢二年以匈奴降者界和王為開陵侯

昭帝元鳳四年平樂監傅介子刺殺樓蘭王漢乃立樓

蘭王先降漢者弟尉屠耆為王更名其國為鄯善為刻

印章賜以宮女為夫人備車騎輜重

重直用切

丞相將軍百

官送至橫門外

橫音光

祖而遣之

為設祖道之禮也

宣帝本始三年校尉常惠將烏孫兵入匈奴右地大克

獲漢遺惠持金幣賜烏孫貴人有功者

元康元年龜茲主絳賓來朝王及夫人皆賜印綬夫人

號稱公主

夫人即烏孫公主女也王上書言得尚漢外孫願與公主女俱入朝也

賜以車

騎旗鼓歌吹數十人綺繡雜繒琦珍凡數千萬

琦音奇留

且一年厚贈送之

二年烏孫昆彌及太子左右大將都尉皆遣使凡二百餘人入漢迎公主天子自臨平樂觀會匈奴使者外國君長大角抵設樂而遣之

甘露二年匈奴呼韓邪單于款五原塞

款叩也

願奉國珍

朝三年正月詔曰蓋聞五帝三王教化所不施不及以政今匈奴單于稱北蕃朝正朔朕之不逮德不能弘覆其以客禮待之令單于位在諸侯王上贊謁稱臣而不

名於是朝天子于甘泉宮漢寵以殊禮賜以冠帶衣裳

黃金璽蓋綬

蓋古戾字戾草名也以戾染綬亦諸侯王之制也

玉具劍

標首鐔衛用玉

為之也鐔劍口旁橫出者也衛劍鼻也鐔音淫衛字本作璘其音同耳

佩刀弓一張矢四

發

發猶今言箭一放兩放也今則以一矢為一放也

縶戟十

縶戟有衣之戟也縶音啓

安車

一乘鞍勒一具

勒馬轡也

馬十五匹黃金二十斤錢二十萬

衣被七十七襲

一稱為一襲猶今人之言以副衣服也

錦繡綺縠雜帛八

千匹絮六千斤禮畢使使者道單于先行宿長平

道讀曰導

長平涇水上坂也

帝自甘泉宿池陽宮登長平詔單于毋謁

不令

也拜其左右當戶之羣臣皆得列觀及諸蠻夷君長王侯

數萬咸迎於渭橋下夾道陳帝登渭橋咸稱萬歲單于就邸留月餘遣歸國是時西域都護韓宣奏烏孫大史大祿大監皆可以賜金印紫綬以尊輔大昆彌漢許之黃龍元年呼韓邪單于復入朝禮賜如初加衣百一十襲錦帛九千疋絮八千斤

元帝竟寧元年呼韓邪單于入朝禮賜如初加衣服錦帛絮皆倍於黃龍時

成帝河平四年復株索若鞮單于來朝

復音服索力追切

加賜

錦繡繒帛二萬匹絮二萬斤它如竟寧時

哀帝元壽二年烏珠留單于來朝加賜衣三百七十襲

錦繡繒帛三萬匹絮三萬斤它如河平時

後漢光武建武十七年莎車王賢遣使奉獻請都護乃

因其使賜賢西域都護印綬及車旗黃金錦繡

二十五年烏桓大人來朝

大人謂渠帥也

南單于及扶餘王遣

使詣闕貢獻

扶餘國在海東去玄菟千餘里

是時四夷朝貢絡繹而至

天子乃命大會勞饗賜以珍寶

二十六年南單于遣子入侍奉奏詣闕詔賜單于冠帶

衣裳黃金璽蓋綢綬

盤音庚綠色綢古蛙切紫青色也

安車羽蓋華藻

駕駟寶劍弓箭黑節三駙馬二黃金錦繡繒布萬匹絮

萬斤樂器鼓車祭戟甲兵飲食什器自是單于歲盡輒

遣奉奏送侍子入朝中郎將從事一人將領詣闕漢遣

謁者送前侍子還單于庭交會道路元正朝賀拜祠陵

廟畢漢乃遣單于使令謁者將送賜綵繒千匹錦四端

金十斤大官御食醬及橙橘龍眼荔枝賜單于母及諸
闕氏單于子及左右賢王左右谷蠡王骨都侯有功善
者綵繒合萬匹歲以為常

二十九年賜南單于羊數萬頭

中元元年南單于弟左賢王莫立帝遣使者齎璽書鎮
慰授璽綬遺冠幘絳單衣三襲童子佩刀緹帶各一又
賜繒綵四千匹令賞賜諸王骨都侯已下其後單于薨
弔祭慰以此為常

明帝永平四年遼東太守祭彤誘賂鮮卑使斬叛烏丸
歆志賁等首於是鮮卑自燉煌酒泉以東邑落大人皆
詣遼東受賞賜青徐二州給錢歲二億七千萬以為常
和帝永元四年北匈奴右谷蠡王於除鞬自立為單于
鞬九言切於除鞬其名也款塞乞降遣大將軍左校尉耿夔即授印
仍賜玉具劍羽蓋車一駟中郎將持節衛護焉

九年益州郡徼外蠻及揮音檀國王雍絲調遣重譯奉國

珍寶帝賜金印紫綬小君長皆加印綬錢帛

安帝永初元年鮮卑大人燕荔陽詣闕朝賀鄧太后賜以玉印綬赤車參駕

元初三年南單于右鹿蠡王須沈擊零昌於靈州斬首八百餘級封須沈破虜侯金印紫綬賜金帛各有差

永寧元年扶餘王遣嗣子尉仇台詣闕貢獻帝賜以印綬是年揮國王雍絲調遣使詣闕朝賀獻樂及幻人明年元會帝作樂於庭封雍絲調為漢大都尉賜印綬金銀綵繒各有差

順帝永建六年日南徼外蠻調便遣使貢獻帝賜調便
金印紫綬

陽嘉二年南匈奴骨都侯夫沈從匈奴中郎將王稠出
塞擊鮮卑破之詔賜夫沈金印紫綬及縑綵各有差

永和元年扶餘王來朝帝作黃門鼓吹角抵戲以遣之
漢安二年立呼蘭若尸逐就單于兜樓儲為南單于兜
樓儲先在京師天子臨軒大鴻臚持節拜授璽綬引上
殿賜青蓋駕駟鼓車安車駙馬騎玉具刀劍什物

玉具標首

鍾衛盡用給綵布二千匹賜單于闐氏以下金錦錯雜玉為之

具駢車馬二乘遣行中郎將持節護送單于歸南庭詔

太常大鴻臚與諸國侍子于廣陽城門外

廣陽雒陽城西面南頭門

祖會享賜作樂角抵百戲

角抵之戲則龍魚爵馬之屬言兩兩相當亦角而為抵對

即今之鬪角古之角抵也帝幸胡桃宮臨觀之

魏文帝黃初元年更授匈奴南單于呼厨泉衛璽綬賜

青蓋車乘輿寶劍玉玦

三年鮮卑王步度根詣闕貢獻厚加賞賜

明帝景初二年倭女王卑彌呼遣大夫難升米牛利等
朝獻詔以難升米為率善中郎將牛利為率善校尉假
銀印青綬引見勞賜遣還并賜倭王金帛錦罽刀鏡等

物事具外臣
封冊門

齊王正始四年倭王遣使大夫伊聲耆掖邪拘等八人
上獻拜率善中郎將印綬

六年詔賜倭大夫難升米黃幢付郡假綬

宋文帝元嘉七年天竺迦毘黎國王同愛遣使來奉獻

主竺扶為建威將軍

九年以吐谷渾慕容延為平東將軍吐谷渾拾虔為平北將軍吐谷渾耀伐為鎮軍將軍

南齊武帝永明二年扶南王遣使那伽仙來獻方物詔曰那伽仙屢銜邊譯頗悉中土閣狹令其具宣上報以絳紫地黃碧綠紋綾各五匹

後魏孝文帝和十五年高麗王璉卒帝為璉舉哀于城

東行宮

宣武永平三年十二月詔于青州立高麗廟

孝莊達義元年詔蠕蠕主阿那瓌讚拜不名上書不稱
臣

後周武帝時突厥自俟斤以來其國富彊帝既與之和
親歲給繒絮綿綵十萬段突厥在京師者又待以優禮
衣錦食肉常以千數

隋高祖開皇初突厥沙鉢略奉表稱臣帝下詔肅告郊

廟傳頌天下自是詔答諸事並不稱名以異之其妻可
賀敷周千金公主賜姓楊氏編之屬籍改封大義公主
七年正月先是突厥沙鉢略獵于常代之間還至紫河
鎮其牙帳為火所燒沙鉢略惡之月餘而卒至是帝為
廢朝三日遣太常弔祭焉贈帛五千段其弟處羅俟立
帝賜之鼓吹旗鼓

十年突厥意利彌豆啓民可汗染干賜來朝射于武安
殿選善射者十二人分為兩朋啓民曰臣繇長孫大使

得見天子今日賜射願入其朋許給晟箭六隻發皆入鹿啓民朋竟勝時長孫晟持節護突厥也

煬帝大業三年幸榆林突厥啓民可汗來朝賜帛三千段乃御千人大帳享啓民及其部落酋長三千五百人賜帛二十萬段其下各有差復下詔曰德合天地覆載所以弗遺功格區寓聲教所以咸洎至于梯山航海請受正朔襲冠解辮同被臣民是故王會納貢義彰前冊呼韓入臣待以殊禮突厥意利珍寶啓民可汗志懷沈

殺世修藩職往者挺身遭難拔足歸仁先朝嘉此款誠
授以徽號資其甲兵之衆收其破滅之餘復祀于既亡
之國繼絕于不存之地斯固施均亭育澤漸要荒者矣
朕以薄德祇奉靈命思播遠猷光融令緒是以親巡朔
野撫寧藩服啓民深委誠心入奉朝覲其種落拜首軒
墀言念丹款良以嘉尚宜隆榮數式優常典可賜路車
乘馬鼓吹幡旗贊拜不名位在諸侯王上帝親巡雲內
泝金河而東北幸啓民所居啓民奉觴上壽跪伏甚恭

帝大悅賦詩曰鹿塞鴻旗駐龍庭翠輦迴氈帷望風舉
穹廬向日開呼韓頓顙至屠者接踵來索糶擊羶肉韋
韝獻酒杯何如漢天子空上單于臺帝賜啓民及公主
金甕各一及衣服被褥錦綵特勒以下各有差啓民仍
扈從入塞至定襄詔令歸藩

四年四月突厥啓民可汗朝于東都禮賜益厚又詔曰
突厥意利珍豆啓民可汗率領部落保附關塞遵奉朝
化思改戎俗頻入謁覲屬有陳請以氈牆毳幕事窮荒

陋上棟下宇願同比屋誠心懇切朕之所重宜于萬壽
成置城屋具帷帳牀褥以上隨事量給務從優厚稱朕
意焉是年疾終帝為廢朝三日

二年六月高昌王吐屯設來朝帝御觀風行殿盛陳文
物奏九部樂魚龍曼延宴于殿上以寵異之其蠻夷陪
列者三十餘國

八年突厥處羅從征高麗賜號為曷薩那可汗賞賜甚
厚

唐高祖武德元年十月戊寅讌突厥使者奏九部樂于庭引骨吐祿特勒升御坐以寵之

十二月西突厥曷薩那可汗自宇文化及所來降帝為之興引升御坐賜以酒食

二年六月己酉突厥始畢可汗卒遣使來告帝舉哀于長樂門賻物三萬段

三年正月甲午宴突厥奏九部樂于庭賜綵有差
五月庚午宴突厥使奏九部樂于庭賜帛各有差

七年七月戊戌交州首領來朝奏九部樂以宴之賚物各有差

八年四月己丑宴西藩突厥林邑使者奏九部樂于庭太宗貞觀元年西突厥統葉護為伯父所殺帝聞統葉護之死甚悼之遣賫玉帛至其死所祭而焚之會其國亂不果至而止

三年正月辛亥契丹渠帥來朝賜之鼓纛

五年十月己酉順州都督北平王阿史那什鉢苾卒帝

舉哀于永安門賙贈甚厚詔中書侍郎岑文本為立碑
什鉢苾始畢可汗之子初與頡利有隙故來奔帝禮之
甚厚

是月雷大酋侯斤多濫曷末率所部與迴紇俱來朝見
拜右驍衛大將軍燕然都督

六年八月賜西突厥莫賀設鼓纛綵萬段

八年正月癸未右衛大將軍阿史那咄苾卒即頡利可
汗也詔其國人葬之從其俗禮焚屍于灞水之東贈歸

義郡王謚曰荒葬事所須隨用供給其舊臣胡祿達官吐渾邪自剄以殉渾邪者頡利之母婆施氏之媵臣也頡利初誕以付渾邪至是哀慟而死帝聞而異之贈中郎將仍葬于頡利墳側詔中書侍郎岑文本製頡利及渾邪之事以紀之

六月戊午右衛大將軍懷德王阿史那蘇尼失卒帝舉哀于大猷門

十四年十二月乙卯高麗長子桓權來朝遣職方郎中

陳大德迎勞于柳城

十六年十月庚子宴諸蕃使于兩儀殿帝謂沙鉢羅侯斤曰延陀本一部落侯斤本我所立始十餘年自筭何如頡利之衆而侵我邊疆我纔發甲騎傾其部落爾欲與我為寃不過欲費我邊境十羊五馬耳今見爾遣使謝罪捨爾前過情好如初宴罷賜帛各有差

十一月甲申帝為高麗王高武舉哀于苑中詔贈物三百段遣使持節往弔祭焉

二十一年正月鐵勒回紇侯利絃等諸姓並同詣闕朝見帝親賚其緋黃瑞錦及標領袍鐵勒等覩而驚駭以為未嘗聞見捧戴拜謝盤叫于塵埃中及還蕃帝御天成殿陳十部樂而遣之

二十二年四月西突厥賀魯以王師問罪龜茲固請前驅願為鄉導仍以數十騎馳來謁帝詔授以崑丘道行軍總管宴之于嘉壽殿文武三品畢景甚歡錫賀魯綾綵仍解所服之衣以賜之

八月以回鶻忠武將軍兼大俟斤俱羅勃吞莫賀咄拔固折為右武衛大將軍

十月甲戌以回紇吐迷度子前左屯衛翊衛左郎將娑閏為左驍衛大將軍大俟斤利發使持節回紇部落諸軍事瀚海都督

十二月新羅國遣其相伊贊子金春秋及其子文王來朝帝遣光祿卿柳亨持節郊勞之既至以春秋為特進文王為左武衛將軍春秋仍請改其章服以從中國製

于是内出珍服賜春秋等令府給其將從

二十三年二月癸巳特進新羅金春秋還國令三品已上宴餞之優禮甚備

太宗貞觀二十三年六月即位七月于闐國王伏闕信來朝拜右衛大將軍又授其子葉護玷為右驍衛將軍並賜金帶錦袍布帛六千段并宅一區留數月而遣之因請留子弟以備宿衛太宗葬昭陵刻石像其形列于玄闕之下

永徽元年五月寶王吐蕃贊府薨帝舉哀于光化門遣右武侯將軍鮮于濟賁璽書往弔祭之

顯慶五年九月蘇定方降百濟王義慈以獻數日病卒贈金紫光祿大夫衛尉卿特許其舊臣赴喪仍葬于孫皓陳叔寶墓之側官為立碑

是年新羅王金真德卒帝為舉哀于永光門使太常丞張友收持節弔祭之賜開府儀同三司仍賜綾綵三百段

龍朔元年九月特進新羅王金春秋薨帝于雒城門舉哀遣使持節往弔之

則天聖歷二年十月吐蕃首領贊婆至遣羽林飛騎郊外迎之庚戌宴贊婆于武威殿極歡而罷

中宗神龍元年七月吐蕃大首領贊普卒帝為之舉哀廢朝一日

景龍二年十二月丙申宴堅昆使于兩儀殿就其家弔焉

四月己亥右衛大將軍員外置同正員濛池都護十姓
可汗阿史那懷道加特進祿料並依品給

六月丙寅吐蕃使宰相尚欽藏及御史名悉獵來獻賜
一書帝御承天門樓命有司引見置酒于殿內享之

七月丙辰突厥鼠尼施首領參有及突騎施領賀勒哥
羅來降命有司宴之各賜帛五十疋

十月庚辰宴新羅使于內殿勅宰臣及四品已上清官
預焉胡祿屋二萬帳詣北庭內屬勅郭虔瓘存恤遣使

賚紫袍金銀帶等二百餘事錦帛二萬段以賜之

十二月壬戌沙陁金山等來朝宴于內殿

三年正月戊申突厥葛邏祿下領裴達于來降授果毅兼葛州長史借紫金魚袋放還蕃

三月己丑突厥支箇忌等來朝帝親臨宴賜綵繡金銀器物錦等有差語之曰胡祿屋大首領軍衛將軍員外置支箇忌卿兩庭種落萬里歸降因變取通背逆從順既披誠節宜立功勲遠自邊隅來朝闕下言念忠款朕

甚嘉之卿等既欲還蕃令宜坐飲務盡歡暢

六月丁巳林邑國遣使來朝授其使右領軍衛員外將
放還蕃

八月丙辰高麗吐渾等諸蕃降附制曰天亡驕子胡運
其終國有忠臣漢封斯在高麗王莫離支高文簡都督
跌跌思大吐渾大首領刺史慕容道奴郁射施大首領
鶻屈利斤大首領刺史苾悉頡力高麗大首領拱毅等
或遼海貴族或陰山寵子智則能永權而善謀從事本

蕃頡頡高位料逆順之道知變通之節或誓以沈族或
翻然庇身共驗郵支之亡遂觀繇余之入將軍遇毅永
罷射鵰使者迎降果聞乘傳棄寒苦之地就陽和之澤
爾其誠哉朕實休之宜開土宇之封式盛壇場之制文
禮文簡可封遼西郡王食邑三千戶行左衛大將軍員
外置同正員賜宅一區馬四匹物六百段跌跌思大可
特進行右衛大將軍員外置魚跌跌都督封樓煩國公
食邑三千戶賜宅一區馬三匹物五百段道奴可左威

衛將軍員外置兼刺史封雲中郡開國公食邑二千戶
賜宅一區物四百段馬二疋鶻屈頡斤可左驍衛將軍
員外置兼刺史封陰山郡開國公食邑二千戶賜馬兩
疋物二百段苾悉頡力可左武衛將軍員外置兼刺史封
鴈門郡開國公食邑二千戶賜馬兩疋物四百段宅一
區拱毅可左領軍衛將軍員外置兼刺史封平城郡開
國公食邑二千戶賜馬兩疋物四百段屈鶻頡川妻契
苾賜物一百五十段手力二人各賜物五十段

十月己未授北蕃投降九姓思結都督磨散為左威衛將軍大首領斛薛移利殊功為右領軍衛將軍契都督邪沒施為右威衛將軍副利羽都督莫賀突默為右驍衛將軍首領延陲薛渾達都督為右威衛將軍奴賴大首領前自登州刺史奴賴孝為左領軍將軍跌跌首領刺史裴艾為右領軍並員外置依舊魚刺史賜紫袍金帶魚袋七事綵帛各三百段放還蕃

四年三月丁亥新羅遣其臣金楓厚來賀正授員外郎

放還蕃

四月辛亥突厥俾失州大首領伊羅友闕頡斤十囊來降封其妻阿史那氏為鴈門郡夫人以向化寵之也

七月戊子大食國黑密牟尼蘇於漫遣使獻金線織就寶裝玉灑地瓶各一授其使員外中郎將放還蕃

九月甲戌蠻大首領洪光乘等五人來朝並授員外郎將特留宿衛

閏十二月東蕃遠蕃靺鞨部落拂涅部落勃律國皆遣

大首領來朝並賜物三十段放還蕃

五年四月甲戌進封奚饒樂郡王李大酺妃固安縣主
辛氏為固安公主

五月壬子天竺國遣使來朝詔曰中天竺國大首領大
野迷地羅梵摩寺殊邦慕德重譯來朝是加褒獎用益
誠心可毅部尉賜緋袍銀帶放還蕃

六月丙子文單國真臘國朝貢使還蕃並降璽書及帛
五百疋賜國王文單真臘皆南方小國也常奉正朔職

貢不絕帝嘉之故有是寵

七月己亥突厥遣使獻馬授其使郎將放還蕃降書喻之曰皇帝敬問突厥可汗使人他滿達于至所言堅昆使來及吐蕃使不願入漢并奚契丹等俱知之朕于西夷亦信而已來無所拒去無所留可汗好心遠申委曲深知厚意今附銀胡瓶盤及雜綵七十匹至可領取十月丁卯日本國遣使朝貢戊辰勅曰本國遠在海外遣使來朝既涉滄波兼獻邦物其使真人莫問等宜以

今月十六日于中書宴集乙酉鴻臚寺奏日本國使請謁孔子廟堂禮拜寺觀從之仍令州縣金吾相知檢校搦捉示之以整應須作市買非違禁入蕃者亦容之

十一月丙申契丹李失活來朝詔勞之曰卿等累輩邦化多歷年所城池郡邑冠蓋相望往緣邊牧非任遂令卿等失業念彼雄藩鞠為茂草今卿等削摧異俗歸誠本朝頻獻封章益明忠款克復州鎮宛如平昔失活將尚公主水為藩臣入拜闕庭良深慰喜卿等涉路遠來

得平安好否近屬節假不得早與卿相見且向曹司安置待後進止

六年正月壬寅奚王李失活永樂公主還蕃命有司加等祖餞其私覲物六千段

二月戊午契丹新羅米國石國靺鞨鐵利拂涅蕃守並遣使來朝各授守中郎將還蕃

五月戊午契丹部落孫骨訥等十八人內屬並授游擊將軍賜緋袍銀帶留宿衛甲子以契丹松漠都督李失

活卒帝深加憫悼親為舉哀使使弔祭乙酉追贈特進
賻物二千段仍令左武衛將軍李玘持節充使弔祭營
州都督宋慶禮檢校喪葬

七年正月乙未封遼西郡王高文簡妻阿史那氏為遼
西郡夫人文簡東蕃酋長率眾歸我故有是寵丙申波
斯國遣使獻方物新羅遣使來賀正拂湏靺鞨越喜靺
鞨並遣使來朝各賜帛五十疋

二月丁未投降突厥延陲磨覽死贈中郎將依舊蕃法葬

三月壬子帝御丹鳳樓宴九姓同羅及契丹各賜一百段小妻主友三十段

四月己卯訶毗施國王捺塞使吐火羅大首領摩婆羅獻獅子及五色鸚鵡帝以其遠來修貢加宴勞賜錦綵五百疋

五月丁酉新羅遣使來朝卒于路贈太僕卿賻絹一百疋

六月丁卯靺鞨渤海郡王大祚榮卒贈特進賜物五百

段遣左監門率上柱國吳思謙攝鴻臚卿持節充使弔祭戊辰吐蕃遣使請和大享其使因賜其束帛用修前好以雜綵二千段賜贊普五百段賜贊普祖母四百段賜贊普母二百段賜可敦一百五十段賜奎達延一百三十段賜論乞力徐一百段賜尚贊咄及大將軍大首領各有差皇后亦以雜綵一千段賜贊普七百段賜贊普祖母五百段賜贊普母二百段賜可敦

七月甲申河西經略副大使兼赤水軍使左金吾衛大

將軍員外置同正員回紇伏帝匄卒贈特進賜物三百段遣中使弔祭

十一月壬申松漠郡王李娑固宴與公主俱來朝命有司借宅給食己未宴于內殿賜物一千五百段錦袍鈿帶魚袋七事

八年正月己巳契丹遣蕃中郎將張少免俱等三百五十四人來朝並授游擊將軍果毅都尉賜緋袍銀帶物各二千段放還蕃

二月乙卯護密國王羅施伊俱骨咄祿多比勒莫賀咄達磨薩爾為護密王賜紫袍金帶七事並雜綵五十疋八月丁丑敕中書門下南天竺王遠遣朝貢其使却還並須周旋發遣令滿望乃以銀袍金帶魚袋七事賜其使遣之

九年六月丁酉制曰念功之典書有明訓贈終之數禮著葬式党項大酋長故右監門衛將軍員外置同正員使持節達恤等一十二州諸軍事兼靜邊州都督仍充

防禦部落使拓跋思恭頃者戎醜違命爰從討襲躬親
矢石奮其忠勇方伸剪馘之勲俄軫喪元之痛壯節彌
亮美名可嘉宜崇寵章俾慰泉壤可贈特進兼左金吾
衛大將軍賜物五百段米粟五百石仍以其子守寂襲
其官爵

十一月己酉渤海郡靺鞨大首領鐵利大首領拂涅大
首領契丹蕃郎將俱來朝並拜折衝放還蕃

册府元龜卷九百七十四